

河北省立第一圖書館 惠存

丁丑孟夏取崑山趙學南謹贈



定思小紀合刊
揚齋見聞錄

4591

天津特別市
市立第二圖書館
04591



天津特別市市立第二圖書館 28-10.5,000

定思小紀

嘉定 劉尚友 金生

余不佞以癸未仲冬六日入都距辭家之日幾四閱月其道路之遲迴舟車之煩殆江南之溽暑江北之早寒不暇盡述憶舟行抵興濟以冰堅登陸晨興連騎鬚眉悉成皓白行者相顧一笑宿靜海公署中早見霜花盈樹玉裹瑤堆映日彌皎識者占爲兵象或曰主國喪云在通州晴而聞雷甚厲頗訝之詢知爲京師礮聲抵城下則崇城高巖雉堞聳峙時不覺嘖嘖曰美哉山河之固斯誠天府也已途中每傳警報而所過邑里村落惟頽垣壞突相向而立或數百里無人煙北人不知有寇至余謂其必有備無患也故意甚安之入城後人事愒促時漸迫歲惟兩督一銓見誅繼而義興賜死是爲大故餘無可論者甲申元旦早朝鐘鼓鳴上已出中極殿百官未集仍卻坐建極待之諸臣於是踉蹌至至者喘欲死其未至者或閉門不得入上皆有不問人謂歲首朝賀不克成禮是亦咎徵初二三夜間大明門外空中聞戰鬪哭泣之

定思小紀

聲似有數萬騎屯集棊盤街者如是者連夕又民間半歲以來無生育者通城皆然夏秋大疫人偶生一贅肉隆起數刻立死謂之疙痞瘟都人患此者十四五至春間又有嘔血病亦半日死或一家數人並死朝中有長人見及馬入門諸異祕不敢傳關里古檜特發四枝有司不敢報其災變往往類是若暴風忽起揚沙走石或二三日一見或一日再三見不可勝舉有何天文者監中之錚錚者也必據書徵說以小函分報各朝貴往往券驗焉按李賊自癸酉歲盤據中原其勢始大左帥先敗孫督繼潰賊遂入潼關得全陝惟榆林一戰死傷特多旋亦遭其屠滅入春渡河而東晉中兩名將一降一走文武俱失所恃然太原猶竭力以抗賊惟苦賊間徧布流言城守之民遂無固志太原既下其目中已無燕京然廟堂議論紛如亂絲疆場戰守茫如撈月聖主焦勞於上羣臣唯諾於下惟圖微倖詎肯擔當孔方之瘠日深門戶之私難破司農徒動仰屋餉事莫展一籌司馬漫應空文兵事毫無定策乃賊既由晉窺畿勢已決突焚棟而朝中或傳關不守或傳賊已退求一確報不可得募一提塘

官竟無其人幸有周鎮遇吉守寧武關力戰奏捷大爲吐氣賊以陰計破之遇吉夫婦猶率兵巷戰因舉家遇害嗚呼自遇吉死勢已不可爲也數節之後迎刃而解國家更無一人迎戰况論勝負耶烈皇帝英明剛斷每事獨出鑒裁然法之不行輦轂尤甚卽如鑄錢造鈔諸務諍諭峻罰而小民敢於抗上終不肯俯奉意旨廠衛緝事非不嚴而訛言朋興遏之愈熾賊檄賊示或投府署或揭街衢至指斥乘輿刻時日而捕之竟不可得愚民幸災樂禍俱言李公子至貧人給銀五兩往往如望歲焉蓋都人雜甚莫可稽覈至菜傭酒保皆爲賊遣故尤難辨云聞上在宮中每夜深獨坐批覽本章旣而歎曰朕非亡國主何爲有亡國事則淚隨言下若先見然二月中賊勢愈急而昌平兵忽變京城戒嚴亟遣官以重餉撫之始戢然居庸已不可守矣二十九日清明節諸臣奉命上陵往例多借此役爲西山遊是日禮畢皆倥偬亟歸朝士方議蠲助各以地類其人各以力充其數江南縉紳集四府會館館主操筆從之人無肯如量而應者或言已貧或代人言貧至作寒乞語爲庸衆人所不能出

定思小紀

諸口者可發一噓余聞之有感擬欲上一疏建兩大樞於大明門左右勸四方忠義士及都城男女各以其力助之如百金及下至兩許者爲一樞錢計及下至分文者爲一櫃櫃盈則告之司計散而奏之存此項備圍城時別募敢死一旅爲祚障突圍之用疏已成苦無同志者相與沿門泣控又事勢已迫急難就緒遂寢其議未幾前門有賈豎罄其貲可百金悉以助國御史上其事朝廷嘉之授錦衣百戶未必非予說動之也然國計實窘極戶部合算海內應解京銀兩歲二千萬現在到部者僅二百萬朝廷至括內庫金帛悉準俸銀給發武士其困可知故援師之徵望其卽赴又若畏其卽赴誠慮夫餉之不足以供也上撫髀無策欲以空名感動天下故唐黃吳左諸鎮封四伯爵以勞之又封劉鎮繼之一日上臨朝歎曰討賊之事朕須自行乃諸閣臣咸稽首願往皆不許至李建泰請行許之刻期命遣禮極隆沃告之太廟餞之正陽門樓上親酌酒賜之諭以代朕至意李感泣誓以死報是日李帶綬皆奮張俗言開華坐中咸目之以爲美瑞而李垣李胤培亦以是早帶綬開華人謂破賊之

兆也然皆空文無實際督相赴敵何等大事竟無一旅標卒僅從屬吏數員徒役百十人而已出城趨真定道中與夫索人以代後擒二賊細則代輿人也聞李至一縣縣人皆漫視不爲禮李從者飢求食縣人曰汝官爲大明乎爲大順乎詭對曰大順乃爲設食甚豐飽餐而去上集九卿大臣會議大計令各條具密對中有及南遷者顧其人物望未愜而事勢危迫度終難行於是羣臣言不可者十九上亦曰國君死社稷恆理也言遷者欲使朕抱頭鼠竄耶議乃止於是遣魏藻德往通州集援兵方岳貢往淮上督糧餉然皆無及卒留之而借助於勳戚內官之家內官亦有助至二三萬者戚臣如太康伯張新樂侯劉等各盡力以助而太康數至五萬進封侯嘉定伯周於國最親而家最富上遣內官令借十萬周止允二萬內官流涕曰公國家至戚吝不肯助如此真皇爺命矣頓足而去十六日會議朝房但相顧不發一論惟襄城伯敢言云今州縣百姓皆從賊畏其殺也我獨不能殺乎自今百姓有二心者必殺無赦衆皆異其言首揆魏倉皇問曰賊勢如此爲今計主戰乎主守乎衆曰卽今

定思小紀

兵餉兩缺計莫如守魏亦無他奇但唯唯而去十六日召對考選諸臣發虜寇兵餉兩策諸臣以次對四輔臣賜坐於旁具紙筆凡諸奏俱籍記之是日上御座去奏對處僅咫尺諸臣密邇天顏無不展盡底蘊者而武昌推官施鳳儀對爲第一上或憑几而聽之或左右顧而哂之或斟茶或磨墨皆親手自爲之如忽忽無緒然非平時莊蒞景象也是晚罷朝聞寇撥騎已抵土城土城去京五六里耳人情惶駭莫知所措然猶謂城堅勢重外有大帥足倚圍三月未傷也故城中多積煤米是急餘無所問十七日礮聲震天知賊至城下然城上之礮間多空發中或不備鉛子城下則賊恃以爲攻每一發必崩屋墜瓦犯者立碎其彈如大指精瑩滑洵利物也故事城守之卒城一墜用卒二人犒必從厚百官分門而守巡城而行是役每墜止用一卒每卒日給錢二十四文至不能飽守門巡察惟在事諸員其餘尙未及也十八日攻圍益急賊驅城外居民填壕造雲梯直抵城下其推車者以新附之衆居前矢石有傷輒易之真賊無一人受傷者所徵唐黃吳三帥吳以初入關不至唐通迎降黃得

功孤軍無援亦觀望不進城中多伏莽人心惶皇士氣益懈是早兩午刻響聞李賊在營僞軍師賀曰城必克矣前攻太原得雨而破今又雨復何疑焉是晚果破彰義門據傳云是夕可徑入城以僞軍師選吉十九日故頓兵未進又云賊定山右時與將士約曰諸軍若出死力破京師當任所欲淫擄殺掠不爾禁由是羣賊皆用命至是日其僞丞相牛金星請曰主人城欲定天下願戡軍士無暴苦百姓且以去就要之賊少頓明日下令曰敢有傷人及掠人財物婦女者殺無赦賊皆駭辰刻入城果爾肅然傳者謂內官某內應開東直門迎入者也聞賊將登城斲手方舉火見之手慄不能施急取袖中黃紙書順民字者貼額跪伏賊乃釋之既入民皆爭設香案頂黃紙而其將又沿門傳令箭以示禁殺先是十八日夜予戚申禮垣芝芳宿次早歸寓予問消息若何云欠佳五更時見宮人內監紛紛競出不知何故適聞前門有王內監率家丁欲奪門出城上用大礮擊之乃反走頃將還抵寓見戎裝乘馬二人馳入此巷卸甲奪路人短衣小帽易之而逃此豈無故而然乎須臾班役來報云賊

定思小紀

四

已入城愕不敢信令再探之予曰信矣不聞城頭礮乎兩日夜無頃刻靜者今靜矣申大以爲詫急索公服欲入朝云是日上召閣部對應侍班僕力挽之姑徐徐少遲報者言已入大內矣申遂裂冠服捐膺慟余亦泣不止因拉之相與微服避入旁舍觀變行李狼籍止取一二寄旁舍主人餘多爲鄰人及班役攜去弗問也是日賊整衆入大明門逆闖耀威武注弓矢於馬上射承天門中其上之旁僞軍師占其大吉既進內朝喧傳呼優人庖人官伎唱童供奉徧城搜括無遺脫者顧未知上所在人皆傳三更時吳總鎮兵到已奉帝后及東宮俱避去矣賊擒近侍拷之未有知者乃張榜文於朝門募人獻帝后太子予萬金爵通侯至次日始知帝后俱死社稷矣聞十八日之夕上知事不可爲於宮中與后妃決隨自縊崩兩宮縊不絕逸而薨於外皇長女在旁泣上手劍自斫之一手爲斷昏暈仆地卒不死育於周皇親家上於是出朝門從西長安街擁衆行意欲爲突陣計過裏城李力阻云外門密佈駕不可輕出遂回而已知不守竟狼狽登煤山畢命於數尺之帛時從死者僅內監王承恩一

人衣有御書如世所傳云云首不冠身衣短衫足失一草履皆實錄也嗚呼天崩地
拆古今同悲是日果三光晦昧氣象愁慘下午時有霏雪云本日賊傳故通政使令
卽日赴任欲得羣臣所上牋牘也又傳魏相國入相國便服由長安門入詰責之令
出大學士范景文尙書倪元璐等皆以是日死之巡視京營御史王章死於兵相繼
死者有翰林劉理順馬世奇主事成德吏科吳麟趾戶科吳甘來御史陳純德翰林
汪偉御史汪承詔李邦華大理卿凌義渠等諸公而翰林周鳳翔嘗於二十一日傳
之入令作卽位詔不從麾之出至寓自盡勳戚如劉新樂合室自焚其駙馬亦舉家
殉難皆世所罕見其餘死者甚多而城破之日婦女相率投井者殆以數百計因耳
目所不及不敢列其姓名也順天府尹孟兆祚父子俱死及劉翰林馬翰林有妻妾
同死皆續聞之其聞變薙髮者如行人謝子宣等皆爲賊所深惡云爲忠臣則死不
死則從何爲作此舉動其後諸人鮮有免者閩人張庶常家玉請歸養不許張強項
不屈賊欲殺之以僞相救得釋兵部主事劉養眞當大會日趨先帝所以頭觸棺大

定思小紀

五

勳舉朝壯之中禮垣聞變決死計家人輩競守之十九日申刻往前門某氏暫憩從
賊騎洶洶中行賊睨視無相逼者在某氏遇兵部秦濟相對泣不食不寢次日聞帝
變又痛哭求死守之者益嚴家人傳賊示百官各朝見願回籍者聽如不出及容隱
者並重處申曰我自回寓無累主人遂返寓中賊已盈室次日逼令見僞官於朝官
聞其名曰申公清望吾輩所久慕仍與衆偕歸別移一小寓至二十三日有人來報
云可賀不死彼欲以降調相處耳旣而曰主將請會申云我知若意遽入室索紙筆
書曰天下大事業已如此報我君親有死而已順朝棄民明之臣子付其僕遂自經
先是令僕具繩僕苦持之力頗憊繫旣畢聞喉間作聲有頃忽墜地又兩刻許竟甦
遂惘然而出諸僕因主決死計皆駭匿惟一童子隔壁聽之云然余是日適他往偶
同莊爾時歸聞之悵甚頃之施孟翔申遵渚嚴文度皆至施曰公此出必不復歸吾
亦當相從地下耳次日二使者仍翼之歸對余泣曰不意又相見也余曰某昨不出
當成君志然此乃大事君福德輕故重活耳申深以爲然二十五日復有數卒至時

申工部亦在寓竟脅之俱去拘於賊將李姓者邸中數十人羣聚一室穢惡飢窘不可名狀每曰押往朝門賊卒乘馬諸人徒步遲則以馬鞭刀背捶而逐之其親友童僕旁立而觀不能一語也又四五日押百餘人赴吏部申與焉賊欲以原官起用辭之甚力因遂放還如施孟翔及孫令修以敬等皆拘囚數日志在必死幸以留用二字得脫者也其不令赴部者歸則用慘刑拷索銀物有夾至三四不止者有牽引株連累及平民十百餘家者死亡相踵京城騷然人始無生趣矣蓋京朝各官舉動賊誦知之甚悉每刑之不承輒曰爾於某日爲某事得其銀若干今何在或曰爾原無銀爾又爲某官有銀或爾子爲某官有銀爾安得諱故皆悚然鮮有不以身殉之者初賊入城時矯情自持卒有強取綢肆物者聞之立磔以徇然耳目稍遠則縱恣自若其將卒俱散處官民之家富者供餽贈送惟恐不得其歡心貧者雖僻巷草房賊跡必至男子爲之執爨婦女被其淫辱或稍具體貌者遇於道必擒而拷之衣短衣者不指爲縫工則指爲廚役若南人必迫令唱歌幼者挾之歸充弄兒其在城外者

定思小紀

六

被禍尤酷於是京都之民如蹈湯火皆利賊之敗而追思先帝不置矣帝初崩於南城賊令舁出東華門與后同殯用市棺入殮席棚爲蓋草草無禮過者悲歎舊臣私往泣拜亦十之一二惟襄城骯髒不肯下力以禮葬先帝爲請乃爲易梓宮耐葬田妃之墓然堂堂英主卒不與齊民素封享子孫之奉備喪葬之禮者等可勝痛哉東宮及永定二王俱避居戚臣家賊索之急乃出賊待太子頗有禮云我不害汝可居宮中太子請居周皇親家讀書賊不許然太子言辭侃侃二王亦英挺無畏惡態每與人言必云賊如何時故相邛在側以筆書手掌示之云今後勿言賊字自此遂留入大內不復與羣臣相見矣賊相牛金星係河南舉子凡賊之假仁仗義皆其作用軍師宋獻策明數將破京城刻期先定僞吏政府侍郎宋企郊文選司顧君恩君恩又兼內院號爲最密此三四人者與武臣劉李輩皆賊所倚爲股肱心膂者賊將劉標下有旂鼓王姓者劉所親信而劉則賊之第一功臣也王頗慕悅文雅樂與朝士有文名者遊詞林中或被汗巖有至死不能自明者舊輔陳演蔣德璟於未變時俱

已予蔣出城適當戒嚴乃微服去陳不免有棧豆之戀竟爲賊斬於所寓門首魏既刑死猶戮其屍邱相瑜亦不勝刑而死方相岳貢賊知其廉然猶被囚辱歸而憤恨死一日從朝中驅文武二百餘人至平則門外盡戮死凡九卿正佐其被拘執者賊卒視之不啻奴隸死中得生十之一二而已賊雖未卽僭位然明代官制大半更革如易內閣爲內院六部爲六政府翰林院爲弘文院給事中爲諫議御史爲直指使監司爲防禦使知府爲府尹知州爲州牧知縣爲縣尹武職有元戎權將軍制將軍等名服色尙深藍文官拜武將之類俱刊定成冊以候頒行其僞將相等三上表勸進業擬四月十六日稱帝矣忽傳吳三桂拒守山海關賊氣驕謂可一鼓下也於十三日率馬步兵十餘萬親往攻之挾太子二王及三桂父同行且云吾姑下此乃卽位耳及往乃知三桂已於先期歸命大清三桂從大兵合拒之初戰大兵不出三桂與賊頗相當及再戰三戰大兵從旁乘之賊望風氣奪遂大敗死者六七萬因急引歸殺吳氏父母親屬共五十餘人初賊破京師各鎮守將俱無堅志關門二督已

定思小紀

七

納款三桂父母子弟在城亦欲降之與諸將士議將士曰吾輩自寧遠遷入關突尙未煖若降賊必分我部曲隸各營吾家屬徒填溝壑耳今有死不願降吳曰是固吾志遂決拒守計家人殲焉太子二王之東人皆見之賊歸無見者京師因盛傳吳奪得之也二十四五日閒賊忽忽爲行計括城中驢騾駝馬以萬計罄宮中所有載之而西或云金銀共十七庫庫各數萬珍寶玩器緞匹俱露積庭階累日夜取之不能盡也又示令諸臣皆從行聞者殊駭其被拘未釋者刑死過半至是悉令絞死冤號之聲達於衢路惟申工部死而復甦蓋有天幸焉俄而傳以二十九日卽位於是人謂賊無西歸之意日來濟運欲實根本耳先是賊方出時諸故臣已有冒死歸者或相煽云某某死於道某某沈於河故在京者多依隱自藏未敢輕試至是賊竟儼然南面一二遺臣有忍死不辱匿影自全者人咸危之然賊中情固怯甚特假此以塗人耳目草略苟且諸不暇問二十九日卯刻僭位是晚三更出奔天旣曙人始知之賊徒皇皇負橐連騎而走宮人內官爲賊所棄者又俱散出但聞賊傳云城門大開

百姓欲逃難者聽出不禁於是扶老幼裹餼糧或自西而東或自南而北紛紛擾擾靡所定向須臾見草場火起矣又見倉場火起矣頃之宮中火起矣已而偏城火起矣時予與趙伯珍避居前門張寡婦客店中登樓四望煙焰漲天海岱順城二門爲正陽左右翼已俱被焚獨正陽門樓大明門及東江米巷一帶未及而賊之潛伺者數十輩居民乃相率荷戈登城爲正陽守護街衢之上連綴門窗器物步步立柵而人各持杖守視其旁鈴柝巡行不絕於道面貌非里人熟識者禁勿許通然人情擾擾如在沸釜男婦皆乘屋脊瞭視余同趙莊嚴三子相與荷櫓而立有頃刻莫保之憂如是竟夕明發城中擒賊之放火及有戀而弗去者累累而出於是推故總戎楊姓者坐城上而舊臣相率守門樓者約十餘人每擒一賊至審實卽誅之賊首副之凡殺數十人而民心稱大快是日道間行者皆令執賊而西人雖久居都中者莫不盡族行然亦有乘勢修隙之事蓋不可問矣余見周皇親率人賈金帛充賞資身衣喪服貿貿步行人咸指而歎焉有宮人逸於張店之東鄰年可四十餘貌在中下店

定思小紀

八

婦哀其無依爲飲食之予嘗詢以故宮事渠言頗悉蓋其入宮在神廟後答應太子之宮故頗知始末也次日有老內官偏訪之稱爲太太既相見則惓然同去薄暮聞傳吳送太子入城令都人服喪出迎俄有人竊言齊化門外張告示首稱大清國不知所謂聞者震駭次早乃五月初一日也耆老相率出郭外數十里迎視見大軍擁一人至導之入將抵東華門所司具鹵簿一人者舍騎登車語百姓曰我攝政王也太子隨後至爾輩許我爲主否衆皆愕哈不能解姑應之曰諾衆或稱爲英宗之後百姓惶惑無措於是攝政遂入朝時宮闕悉燼所存者止德政一小殿攝政居之從兵甚寡於道旁埋鍋而爨無輒入民家者民或往觀弗之禁市井小人間從瓦礫中拾取碎物遂爭赴之婦女亦有乘轎往來朝門者守卒云汝家皇帝在亦如此聽汝走耶女轎過則相與竊觀之相與一笑已而下令百官俱於次日報名見朝通城人盡行薙髮於是民間各具啟願從舊俗而新任兵部侍郎江南人亦力奏免議以收人心攝政王云我存若輩首若輩乃惜此髮耶命城中人服先帝喪三日而後遵新

令所以慰輿情也前是人皆傳太子在吳三桂所及入城惟見大軍漸至漸多吳自率兵追賊要其輜重數百車而返不聞有太子也申避賊潛自匿聞賊既去乃出會聞薙髮之令限月之初九日則密約余復聚舊寓商南歸之策曰此事有性命憂不敢強諸同好乃與余各易一二敝衣舉所攜行李悉棄去以初六日冒死行余出順城門申出海岱門與其諸從俱子身無所持惟僱得小車二輛可載四五小裹予附其必不可已者僅襍被一二事是晚止玉皇觀中余驚憂之餘中夜遂患洩瀉明日與浙友十餘人同出右安門道者謂門外皆盜也恐不可行然勢不能止出門後行數里道旁有驢異之因雇之行三十里價高數倍小煎片刻申又覓一驢先去余輩皆步道旁高樹甚密心咸危之未十里申先遇盜余與衆望見則團聚而立一盜持弓矢若將射余者全出袖中一銀裹擲之竟過初浙友多以勇力自負至是無一人得免者而所附車中小裹及敝袍俱盡又前臨一河適有塞衛余策之以行水沒蹀弗顧也既渡濱河有十數赤漢聚草棚下博疑其爲盜既行未五六里見林中有老

定思小紀

九

婦探而入須臾三四盜挾弓矢刀仗至又罄劫之再行數里餘余欲前則執鞭者不肯往乃解一小葛衫及白布巾小銀簪悉准與之此人終不悅而去是夕抵固安余憊甚不能食明日雨行三十里無事余疾轉甚又明日仍不見一驢至霸州見兵卒迎新道者數十人意甚猖披急過之宿蘇家橋是夕大雨旅舍極猥明日呼二小舟欲達獨流行數里舟人謂不可去前途皆伏莽也而車夫皆棄車去余輩乃登陸詢土人謂東北行十五里有左家莊可避賊則相與錯行蘆葦中久之乃得田畔又久之而見所謂左家莊蓋中貴二王公別業其弟稱王六爺者居之阻於水不得入以情懇數四乃容留東客店中其主人意頗厚朝夕所需皆不取直也顧其外宅兒無一善狀明發見持弓矢刀棍者紛紛前往與其主人言之主人曰然吾今使若輩之魁護行必無患矣遂行二十里護行者將欲歸而莊中人復至云前途定不可行請令護至滄州議謝三十五金立券契已而果見執弓矢刀棍者又紛紛歸也余臥小車中任其所指更一河如梁山泊中泝漲不知何地或云滹沱之支流也覓二漁舟

行半日抵所謂王家口鎮霸州大城縣界其地步步立柵練鄉兵防守甚嚴余輩至不能覓一宿店幸有浙友在與紹興胡于王名賓明者爲同鄉胡順天庠生其翁常開店此地于王亦以耕賈自隱偶言及欣然願留乃獲卽次之安此五月十一日也顧余病劇甚諸君亦爲暫住以俟之又數日土寇紛起浙友乃分隊行申亦不能久頓余勸令前勿以余故誤大事遂自此判袂焉初胡亦擬同歸余因寄食徽友胡伯乘家夜宿龍母廟中伯乘家無僮使又北俗食粱粟以余病故特炊秣米爲飯頗不使而寇復駭見逼伯乘避居邑城幸胡于王尙留乃仍寓胡氏然兀兀不遑朝夕昔人謂天地雖大豈能容汝非誑語也又十餘日土人斃一賊其地始稍安而余病亦漸瘥先是申語余病愈仍當入京同遵渚孟翔行至是聞京城薙髮之令甚嚴遂不作為想第兩附書訪之意欲覓少路費竟杳然後聞南人俱大隊還乃知兩公及諸同事俱先我而南矣承主人相待甚厚然食飲未慣久乃漸安初爲余設大米間數日一具酒肉所以云敬也胡有一妾一幼女一妻弟一姪皆欲率之南歸俟田事

定思小紀

十

成方行語余且姑待余不得已聽之然耳中所聞或凶或吉既無伴又不能獨往付之天命耳至七月胡亦另移小房余寄頓王星樞家祠中王爲鎮中巨室又有名邑庠極見愛居停兩月池館花木之勝宛然江南邀余作詩文頗多令子弟誦之而里中友如王公鼐尹見丁吳宗文輩咸加敬禮亦多以是見索者故自三月來筆不敢成一字而王家口遂得數紙云八月聞江南新王立中秋忽傳訛報既知其屢乃安是時各州縣新朝俱爲置吏有土寇則發兵剿之凡縉紳在籍者俱令人京原官加級不赴者處涿州馮相矣大城劉總憲矣霸州郝吏垣矣靜海王侍郎矣高內院矣此皆密邇寓地故聞之甚詳新學使爲侍御曹溶已行文歲考文體不用排偶以文信國陳止齋文爲式用四書題作小論八月望後胡內戚陳元箸在天津爲餉道從事來書約胡同行隨訂定楊姓一舟至二十九日辭鎮中諸友棹一漁艇赴獨流菱蓮萬頃一葉蕩漾且驚且喜申餘抵岸覓宿處久之始得焉待津門舟又八九日始至目斷心碎不能爲情及鼓柁而行乃有家鄉之望然淺阻艱虞步步窘迫見一

戎裝則心寒聞一兵耗則色變關閘之費不費舟船之稿十倍蓋戛戛乎其難之子雖舟行實無日不陸雖舟宿實無日得安早在夢中聞上流之呼則蹶然起晚泊河下分班防守胡每代予任焉所至皆極目蒿萊至一聞輒有三五人從頽垣中出幾疑鬼物所求或不遂其意則板遂不起其夜必竟夕不眠水之淺處聚衆船之人築活壩始過舟中無老少貴賤無不助邪許役者鄙諺云趁船牽絳衣包自撰余旣子身無行李每執是役輒以此言自嘲經臨清土人安居如復有生氣先聞申嘗頓吾邑二標店中爲其行蹤而二店俱已往涿俄延三四日見大兵萬餘南下旣聞山東諸郡惟登萊尙奉恆藩以守其餘悉定凡土寇梗道者率望風匿影故余輩舟行雖澀而幸無他虞南旺上下有安山長干諸地久爲盜藪余舟僅而得通其先過者有三十餘號無不被掠史相家眷屬舟亦與焉十月望後抵濟寧東省大臣如謝陞潘士良俱赴京陛見而汪鰲永方大猷者督撫東地有總河楊兵道朱提鎮楊仍駐此地民居相雜市肆之間諸貨填集往來交易不異平時凡南面之事俱決策於總河

定思小紀

十一

總河閘閉不通商舶使下鹽艘居最棗梨次之暨有眷屬者悉阻河干幾二百餘號延數日胡陳趨二十里石佛閘別買小舫以行仍禁弗許又數日胡謂余曰彼所阻者貨物及婦女耳若一身何慮爲吾當送子歸再來取家眷也余不敢應胡謂予曰今卽啟閘河凍不可行吾有至親在此苟食足固無害子旣歸後吾亦返家園一料理歲之前後吾復至此矣遂卜於十一月初九日五更發足胡負小被囊予踞蹶從之晦昧中遇一徽友汪姓者同行天明抵石佛汪姓者與二三杭友泊一大浪船河下其中皆棗也亦爲兵阻而杭友亦欲先暫歸南與胡同鄉志合遂訂合幫之約先爲予兩人覓便往杭是夕宿橋杓次日黃昏到夏鎮暮夜覓宿幸與同舟濟人得舊寓止焉明晨覓杭友不可得輒隨濟人同行十餘里遇小車空回去予雇之以行而胡步隨相護申末至陰平未到里許有莊樓下一人止予輩宿其家牆壁破敗而父子俱鶉結往返皆博徒余心疑之然是夕竟安寢次朝過陰平道荒寒之狀一望數十里無人蹤吾兩人行甚早道旁榛莽錯雜心益危凜辰刻乃逢一南來人彼此各

有懼色蓋欲以貨上濟寧者也問余北信以實告之頃之又得空車予復雇之行胡終不肯自逸至臺兒莊聞泃口有便船可附又竭力往抵寓而天已黑計行程百有餘里早起河干止一舟載芝蔴南往者遂附之解維已過午二十里卽泊明日行亦過午忽見岸邊紛紛皆難民云宿遷夜來已爲大兵所破舟中人皆愕眙暫停觀望又越宿聞十二日大兵破宿城留一日卽去乃行會主商訪親醉不能起復彌日而至宿宿初破後船之搭載者殊少胡先登岸已覓得杭友之寓欣然呼余同往忽有招舟子余急欲應之胡不可蓋恐負杭友約也是夕遂移宿杭友寓中聞宿之破十一日大兵已紮營邊牆外縣令遣一生長出講責以不報恩不復仇不通商三事已而三四撥騎逼城宿人射之遂一闕而進士民開門延入惟遇軍裝者殺之掠市貨萬餘去十八日淮撫田總河王俱到明日閣部史到縣令及守將叩頭請死史釋之問曰措今置何策令曰惟有恢復山東可守不然則徙邑耳於是史卽渡白羊河商徙計余輩以二十日買一葉浮河舟小人衆冰雪交集三日始抵清江浦中途杭

定思小紀

十二

友舍舟而騎余兩人窘於資遂始終從舟其艱難險阻更數倍於北道也特身入南境聊以自慰耳自清江歷淮揚無日不大雨雪既乏兩具衣履全濕從泥濘中跋涉動輒數十里附舟從險則身如露處斧資將罄則事多弗給以二十八日之早涉江而過雪花如掌天水弗辨亦一景也登京口岸向來怛怛似覺頓釋而雨甚無舟宿一小寓湫隘喧雜食弗能飽以丹陽水澀梗道十二人共乘一船暮宿邑之東門次日爲臘月之朔步走二十里至陵口途狹僅三四尺濘深半之左岡丈餘右岸壁立不啻蜀道難也行者相繼傾仆余策一蓋蹣跚跋涉竟無恙語胡曰此余九九難中之八十一難矣胡笑謂然過此乃與五人共僱船達蘇郡抵金閭爲初三之早訪申君遼渚云已入京晤宣茂灌始知家信蒙茂灌意誼肫肫爲之留宿次五更舉火出城附太倉州舟昏時始到復匍匐五六七里暗中崎嶇又非熟徑覓宿店至歷數家辨聲貌而後容之路途之難如此轍軻之況如此諺曰出門一里不如家裏其信然哉次日凌晨行十餘里至鹽鐵口適吾邑一浪船泊岸遂買之以歸至家纔申刻此

十二月初五日也骨肉相見悲喜交集追維難中直如再世兒輩苦留胡君數日欲稍申款洽而行意愆遽予亦體其至情不忍固留初七方曙予父子送至南關而別其費固不能酬其一二也初予在京時方二月下旬賊報已急予歸志甚決其從者亦多同心申素公固留不遣至見於詞色三月初二日南歸者至數千人車馬爲一空予因素公上陵之役遽巡未暇馴致大難豈前定數歟自賊入之後有位者固不能旦夕安而予亦履冰蹈尾無生人趣所服氈帽青衣必求最敝者爲貴在室則日三四至搜別驗問無已時在途則爲賊所物色誤以爲官長也欲牽之去見賊騎過必避道旁自素公在禁中予往視之道方半大風拔木揚沙兩旁居民俱閉戶惟數百賊騎馬相徵逐而已余從馬邊過慘黯酸惻疑在黃泉道中至其門見各家親友僕御相與門外立悵望不能通一問因復冒風雨歸兩目傷作楚者旬月既而俄聚俄散或此或彼詩云謂天蓋高不敢不局謂地蓋厚不敢不躄又云我瞻四方蹙蹙靡所騁古人所云信不予欺然惟四月二十九日與伯珍回寓時釜魚甕鼈皇皇待

定思小紀

十三

盡此爲最苦行李書籍始變之日已去其半及歸時乃竟化爲烏有真渣滓盡而清虛來也素公前致其死後避其僭灼然在人耳目間沉幽囚竄匿之餘其苦尤十倍他人而歸乃不免吏議何歟孟翔不死而逃或欲得當以報漢後一年而殉難於維揚士固未可輕議哉余爲此紀前以國事重故不敢詳敘行蹤後以歸心切故不復多及身外要之人生艱難世事反覆於此已略見之爾

北還紀變

吁嗟重吁嗟我生胡不辰入都甫三月蹇值皇途屯往予客武昌羣盜方紛綸闖獻

號最劇豫楚幾無民張既北陷襄復入蜀李獨西入秦而破孫入陷襄楊有罪嗣昌入秦孫

可論秦督時詎無大帥尾賊徒逡巡左良玉賀余聞烈皇帝永日眉常繫司農惟仰

屋倪元司馬空推輪張國維與加賦既無奈徵兵誰能遵自余入都時西事益震鄰

榆關塵戰罷榆林大戰太原如摧筠山西自高傑等或走或風馳至寧武賴有將軍

噴噴血殉全家丹心化青燐周迺吉血難運由此抵京國抗旌無一人唐平兵變居

無人明主懷焦灼羣工務因循既以金玉貴還緣門戶賄賂愈章積習不可湔忠

讜胡由仲會議詔日下公卿何嶙峋莫能發一策相與為彬彬二相既以去陳演將

告魏公膺春新首德方倚干城任而亦非純臣當其會議時亦以戰守詢僉云守較

可魏但如迷津天子赫然怒命相親衣衾李建御樓餞李公君臣意氣真正陽門樓

之綏傳聞出都後跬步皆遭逆賊與夫皆終日行賊中時時如在陳真定一帶虜傳俱

定思小紀

一又擬遣兩揆赴通暨淮濱募兵與集餉各自為縫紉擬命魏藻德往通募然亦竟

無及相對徒沾巾三月十六日救宣諸新紳王孫蓮咫尺天顏前有懷靡或埋是

夕聞賊警前驅略都闔去京先是帝每朝嚴恭惜笑頓咄咄真怪事動止胡不偷聞

日帝笑語不常頗失恆度似有默告者妖徵先在娠平明報先郊戎馬如飛鄰於是始城守人心

誰克振番番執戈士飢餐苦無緝守城士卒每日給錢二內為賊間多無非賊黨外

焉良將汎等不聞背城一惟聞空礮頻續城內無鐵石唐通既迎降得功學隱鱗入避

山澤清呼不至三桂遙酸辛間有勤王旅王永能無須暮晨城中憂不給借餉先婚

姻吝財嘉定張太康助五萬周嘉定封拜及紛續加侯爵甫及十八晚彰義已亡

唇外城先破賊騎繞內埔輦前成束薪杜勳奏惡言杜勳通賊帝怒齒輦斷突圍

既不得還宮姑飲醇處分子女畢中宮早懸鶉勿使汚賊刃為語諸妃嬪帝率黃門

數十騎欲斬關出襄城奏不可而還至宮飲泣不得已帝乃慷慨步登山時未寅從

送三子於張周二賊手劍長公主皇后自縊諸嬪賜死帝乃慷慨步登山時未寅從

龍者承恩匹帛升蒼旻經大樹短襟衫有手對於乎天地坼萬古奇變臻晨炊賊乃

入揖盜有凶器初猶示不殺傳言張縉產杜動等開門或疑賊固仁索帝卒不獲揭

榜懸楓宸繼安帝后骸席舍會無茵門懸榜索帝立殺格於東華明發諭各官但出我

無擯投誠一見後聽爾思義專出示各官願歸主由是諸臣中如蟄之復展次日各

豈無忠義士誓不受汶汶從容各就死相勵還眞淳大學士范景文尚書屈指二十

餘炳耀如祥譽其餘或潛遁遠害以全身最慘被囚辱銀鑾聲麟鄒逢吉謝嚴刑

苦相逼所括惟金銀可愧諸大僚財竭身亦殉陳演間有脫羅網未幾皆捐賓邱瑜

等委身事賊者大抵來自邠黎志中朝有數子希得相公資周某等投恩倖積薪比

至者日以麀是為最無賴何異東郭饒先是大會時諸璫淚如澹羣擊張司馬易棺

頗有因百官共擊縉烈烈襄城伯勁節挺不羣齒劍爭葬祭卒能以禮窅李國楨獨

得帝禮葬祭後爾時賊氣驕謂人已大馴簡才重名器登極極郊禋擬於三月二日即位正擬

次第舉設官選邇均設官東至然聞識者言此輩徒猖君臣皆沐猴安得逮冬春

僭位業有目吳侯克自恣抗賊四月十之三賊徒行號率師十要挾烈皇嗣云卯

定思小紀

十五

屢千鈞挾太子二王及前茅甫至關勢靡如駭麀始接戰須臾大兵至遙望絳無垠

屢戰屢敗亂奔亡屍填吻望見大兵先已歸來計無出席卷宮中珍內廷珍

入還我白兜整秣我青騏驎諸臣各從駕吾其歸西函忽又僭尊號冕旒披鞞四月

二十九日僭是晚旋遁去平明無一依宮殿悉縱火徧及諸藏困煙燄忽漲天城樓

徒存瑾次日草場起火宮殿倉庫各衙門及城樓一時悉縱於乎千載基一旦成胥

淪回首賊至時興亡纔四旬來去共民生如草菅豪傑皆荆榛貴果不如賤富誠不

如貧浩浩塵劫中誰分玉與珉夏五朔之二幽谷移陽春吳侯逐賊去俘虜手不龜

每桂道重熙朝啓鴻運入國憑雙甄攝政王單不一二年平賊如掃塵余雖老布素

痛定猶吟呻狼狽歸何言筆此代史悼

右定思小紀一卷明劉尙友撰案尙友字企生嘉定人仕履未詳據書中言欲上

一疏建樞大明門勸捐助則當亦筮仕京朝者中記十六日召對考選諸臣武昌

推官施鳳儀第一又記予戚申禮垣芝芳宿科云云考鳳儀崇禎丁丑進士後官

惕齋見聞錄

嘉定 蘇濼 眉函

甲申三月闖賊已破燕京時邸報斷絕至四月猶微比如故縣令曹石震名胤昌楚中

解元向操選事曾遊吳中名噪一時邑紳趙芝亭名洪範舊曾宰麻城曹故麻城人也

先是趙以事與同邑鄉紳侯廣成名嗣曾有隙輿論直侯而鄙趙同時有民若凌若顧

數十家訟趙於巡方巡方檄下郡司李倪伯屏名長圩理之倪亦浙之解元亦名進士

時又署篆於嘉侯廣成翼庇諸民致趙訟大失理毀其園硃筆書長歌置其園之門

趙恚甚營曹令至思欲一翻嘉之局曹素有才名縱情詩酒尤溺龍陽不檢於政然

樂與文士交每於朔望之次日會諸士而課之時藝題外詩則有古近體長短歌截

句古文辭則有書頌文記等題三月內課題有寶劍篇上李括蒼相公蓋以京師告

急李公督師三晉也端午後始得北信於是邑有逆奴乘亂焚劫索契之變常鎮觀

察程公奉檄至執亂民戮數人而亂定曹亦以是時罷去在嘉泚政甫三月縣令之

惕齋見聞錄

速於去未有若是者也

是時南都擁立新主雖馬瑤草秉政同時在朝者尙有高學士姜學士諸小人尙未

進用蘇撫軍爲浙祁虎子名彪佳號稱得人按君猶屬北產周君諱一敬爲人柔懷無

骨時新主初立哀詔未頒猶衣朱衣往郡學諸生袁姓輩百餘人闥堂立致易衣始

散去後學使者行黜閑堂生十人外嘉定廩生須長瀾亦與黜嘉之新令則南選浙

江嘉善之錢不識也名與前曹令同榜進士在廣成爲通家子弟年少以英異聞及

爲政專尙剗削民多怨譟猥薄之徒作俚歌以相嘲謔其言極鄙曹又極思曹謂曹

去而錢來不如曹在之爲愈也聞於錢錢疑庫吏鄭某所作羅其叔姪三人並斃之

獄一夜氣盡時論冤之

錢令浚邑無一年時方浚顧浦畢愁怨孔多而南都適又告變矣家居涓浦與城相

隔聞有市井無賴兒嚴三值令坐堂推倒公案羣情洶洶嘉庠有無行士分烹庫帑

錢令陰召吳淞官兵自衛淞帥吳志葵遣兵五十餘人撲人於市見頭戴方巾者盡

索之去人之思匿者匿其中卽免於難一時遂有毀冠裂巾之歎錢亦卽於是夕從顧浦遁去殺一人於內衙埋於土後發起驗之亦衣冠實浙產也

朱寄林者寶山人與傅孝廉

之名

同里家世新安業本商賈寄林獨秀挺孝廉見而

奇之招之家塾令習舉子業甚聰慧爲文雄肆可喜孝廉益爲延譽寄林賦性不羈忘孝廉獎掖之力反加譏訕且訐其帷薄事於人孝廉聞之怒因與錢令善曦使捕至徧歷諸酷刑久寘於獄及城破空圜縱囚寄林始得出遽稱游擊督三四十人號曰義師空城直入獲南翔生張有光有光時已薙髮寄林坐御史臺行館執有光亦徧加酷刑一如錢令之加寄林也刑已卽梟其首適太倉浦家兵至寄林遂遁去後又聽用於土撫軍國寶恃才放誕作醉揚州傳奇以詆孝廉且不更其名至今坊板行之

李成棟者高鎮部下之降將也率師過礮城初有紀律隊伍肅然師駐吳淞吳志葵退守寶山與吳淞一江相望成棟輜重皆用舟舁至嘉定東門外銜尾三十餘艘舟

惕齋見聞錄

二

中忽有豔婦聲告哀土人詢知爲破維揚時所掠之婦也鏈其足於舟市井惡少年慕其舟之所有聚羣不逞之徒乘夜火之人蓄一空衆知觸成棟之怒遂謀守城以候廣成民望所歸往南四十里外迎之於支狄港廣成不得已應之而入城遂以守成棟雖命旅相攻心實輕之遣百餘騎黎明過羅店時鄉兵並起衆遂襲殺其渠帥頗有斬獲餘騎遂返而成棟輒暴怒磨礪勃發先破羅店快其憤然後悉衆西攻嘉定飛礮如雪攻五日城遂不支一時屠戮幾盡牽連婦女掠去纍纍蓋舟中婦人先爲之妖也

守城時鄉兵雖衆皆未訓練之人廣成請援於松郡時松郡亦義兵自守鄉紳沈人伯主之廣成書至人伯命民兵統領蔡姓者督五百人來援號蔡鐵鞭甚雄偉比至與成棟兵戰於東南門之交蔡揮鞭一鼓而殲數人勇冠一時然以衆寡不敵蔡亦旋引歸

嘉定之破也死節義者不一人黃陶菴與其弟偉恭自經於西林菴僧舍陶菴甚從

容偉恭猶激烈陶菴未就死偉恭促之曰阿兄何不速死遂同赴死偉恭在東陶菴在西陶菴曰倉猝中不可失兄弟之序遂解其繫易之而上經時暴暑經六日後余兄或齋名調字周聲入城收其屍偉恭已腐敗不堪而陶庵顏色不改皮毛之間微潤而已此從容與激烈平日所養之徵也然同時尚有從容激烈如夏雲蛟唐培二生者皆嘉庠高等士夏居城城陷夏度不保服其公服巾紱藍袍踞牀而坐及兵入斫其頸不動唐居羅店手執鎗矛爲鄉兵倡身則裹書作甲外加布以束縛之與成棟兵對壘身被數十鎗猶直立不仆罵不絕口而死今夏事人多載之唐竟泯滅不記以生時夏之交廣而唐則閤脩閉戶之士也雲蛟字啓霖培字自因

自渡江以來揚州既破尙嬰城而守者在常則爲江陰在蘇則爲崑山嘉定在松則郡城與其屬衛金山而已時有苦莫苦於嘉定慘莫慘於江陰之謠以屠戮惟二邑爲甚也至城小瀕海守之特久歷三時而不移者莫如金山夫金山一邊海小衛獨侯指揮一人倡義固守及松郡既破而金山之守益力斯時也外絕應援之兵內無

惕齋見聞錄

三

餼糧之恃臨陷指揮先焚其一家老幼二十餘口然後朱衣象笏正位而殉之雖其世職固宜然天下之世職不止侯指揮一人指揮實鐵中之錚錚者

七月四日成棟破嘉定城徧索侯廣成得其尸於葉家池取其首懸之藁街餘不問任諸兵將屠戮一晝夜搜索兩晝夜席卷而西往崑山吳淞不留一人先是鄉兵起成棟登吳淞城望而泣曰吾師殉矣斯乃絕地三面受敵一面距海深悔其來遂沈船破釜作必破之計乃鄉兵素無訓教一時烏集何以決勝至是雖得大捷而成棟決意西行是時吳志葵猶守寶山旌旂森列聞嘉定之困不發一旅以救如秦越人之相視嘉定一空城西有太倉浦六浦大東有吳淞馮調元徐貞甫各聚徒衆後先括取然後斯城爲成棟梳而太倉吳淞分匱之矣

馮徐皆吳淞勳胄馮猶稍示寬大貞甫則殘暴性成命其徒日執民之未薙髮者斬其右手如獻賊破蜀狀時官兵無一人鄉民自爲保聚嘉民日相殘殺以髮之有無爲讎敵矣余奉母潛避江東依親故居一日觀志葵舉動知其地必受兵不可託足

遂因沈宏之渡海往崇明依沈廷揚

廷揚崇禎朝卽建策海運受烈皇帝知宏光元年以戶部督餉淮揚今率其運艦聚兵海上時義陽王僑寄崇明從之者有張河鎮張海鎮孔總兵及內相李輔國以廷揚爲監軍而河鎮之兵獨稱雄健有川兵八百餘人九月河鎮率兵戰於劉河水陸皆不利師還諸帥遂議棄崇明南往舟山就黃斌卿荆本澈廷揚崇產也亦舍桑梓而南予有母而不能從遂留得廷揚部將沈爾韜鮑國祥周給以資晨夕後爾韜死國祥亦去予隱崇明壑鎮之鄉曲

崇明在海外洪武時張瑄之徒以舟橫行南北土人皆善駕船出沒海洋闖賊流中原時先有顧三麻黃四尖三沙王大輩爲盜宏光旣立稟號令爲將帥黃更奉約束投史相國號伏波營時皆在崇位列河海鎮之下及星散後遂各相雄長隱有并圖之志矣

黃四陰蓄死士一日約顧三王大飲酒甫接入而力士先伏門屏之間突出斫倒顧

惕齋見聞錄

四

三而王大卽越牆走力士揮刀傷其足墜地而斃之有施三麻者復陰召荆本澈及荆至亦執黃四尖戮之三麻遂薙髮荆去遂自作主帥忽有廟灣來巨艘七十餘號自稱將軍高捷又殺施三麻及其黨數輩捷亦南往舟山

十二月余奉母歸故里縣令楊之賦楊大洪之子也兄弟一時皆出兄之易爲松江同知不半年嘉定復有土寇王二拖豚作亂燒縣治劫獄庫之賦卽被繫之易次年亦爲吳提督所殺

江南旣定土國寶與吳勝兆同來土爲撫軍建牙蘇州吳爲提督分符松郡吳故遼陽人不知書有蘇州戴輔公爲之謀主知名之士翕然並集人心樂附吳遂通黃斌卿與舟山往來呼吸共起兵期以某日海中揚帆至吳殺松郡守土官以應之至期吳果召各官至會飲至夜分海艘杳然蓋船至必需東南風是日則大風自西北而起也吳卒發伏盡殺松之府官而事以起中軍詹世勳度事不成遂縛勝兆檄報土撫而朝中命巴帥至矣

巴帥至從勝兆篋中獲得簿籍吳爲大將軍松郡鄉紳陳夏輩並爲六部尙書於是羅騎四出蘇松之間騷動一時如松江夏允彝陳子龍長洲楊廷樞嘉定侯岐曾嘉興徐石麒及子式穀輩按籍而求無不糜爛

勝兆未舉事之先上海民殷起巖周以寧者傾貲結客陰相號召南至海寧海鹽北至常熟江陰數百里之間線索相維繫亦有簿籍可稽及事發勝兆被縛起巖在帳下盡取而燒之數邑子弟賴以安堵殷周之徒亦殞於斯時矣

洪承疇坐鎮金陵斫伐鍾山松柏斬俘諸王子弟無虛日時徽州鄉紳金聲字子池州生員吳應箕字次尼等猶各起兵相拒皆以寡弱或爲擒獲或因戰死至吳志葵同黃蜚久頓兵於松江之豆腐浜延挨觀望終被擒解金陵亦戮死

金陵失守後閩中立唐王改元隆武浙東亦推魯王爲監國閩浙遽成水火閩遠風聞未確浙則封方國安爲荊國公封海鎮張鵬翼卽前從義陽王由海道入浙者爲永豐伯方守巖州張守衢州無亡矢遺鏃之功而勳爵復爛然如南都故態於是方

惕齋見聞錄

五

逢年張國維宋之普俱入魯王閣辦事國維素有清望督師江上又如李建泰之在

太原

豫王兵至金陵時宏光奔出城有趙監生者率市人出王之明於獄之明卽馬士英阮大鍼指之爲假東宮而囚之者也於是忻城伯趙之龍復挾之而出降豫王又命降將廣昌伯劉良佐追宏光於燕湖及之以獻豫王馬士英率黔兵擁護太后走浙至紹興紹人不知宏光所在王思任字季重遂上疏請斬士英云戰鬪之氣必發於忠憤之心忠憤之心又發於廉恥之念事至今日人人無恥在不憤矣所以然者南都定位以來從不曾眞真實實講求報雪也主上寬仁有餘而剛斷不足心惑奸相馬士英援立之功將天下大計盡行交付而士英公竊太阿肆無忌憚窺上之微而有以中之上嗜飲則進醞醪上悅色則獻妖淫上喜音則貢優鮑上好玩則奉古董以爲君逸臣勞而以疆場擔子一肩推輿史可法又心忌其成功而決不照應之每

一出朝招集無賴賣官鬻爵搜盡金珠而四方狐狗輩願出其門下者得一望見費

三百金得一登簿費至千金以至文選職方乘機打劫巡撫總督見兌卽題其餘編頭修脚服錦橫行者不在話下矣所以然者士英獨掌朝綱手握樞柄知利而不知害知存而不知亡朝廷篤信之以及於此也茲事急矣政本閣臣可以走乎兵部尙書可以逃乎不戰不守而身擁重兵口稱護太后之駕則聖駕獨不當護耶一味欺蒙滿口謊說英雄所以解體豪傑所以灰心也及今猶可呼號泣召之際太后宜速趣上昭臨出政斷酒絕色臥薪嘗膽立斬士英之頭傳示各省以爲誤國欺君之戒仍下哀痛罪己之詔以昭悔悟則四方之人心士氣猶可復振而戰鼓可厲邑桑可固也思任又上書士英曰閣下文采風流才情義俠職素欽慕卽當國破衆疑之際援立今上以定時局以爲古之郭汾陽今之于少保也然而一立之後閣下氣驕腹滿政本自由兵權獨握從不講戰守之事而只知貪黷之謀酒色逢君門牆播黨以致人心解體士氣不揚叛兵至則束手無策強敵來而先期以走致令乘輿播遷社稷邱墟閣下謀國至此卽喙長三尺亦何以自解也以職上計莫若明水一盂自勿

惕齋見聞錄

六

以謝天下則忠憤節義之士尙爾相亮無他若但求全首領亦當立解樞權授之才能清正大臣以召英雄豪傑呼號惕厲猶可倖望中興如或逍遙湖上潦倒煙霞仍如賈似道之故轍千古笑齒已經冷絕再不然如伯嚭渡江吾越乃報仇雪恥之國非藏垢納汙之區也職當先赴胥濤乞素車白馬以拒閣下上干洪怒死不贖辜閣下以國法處之則當束身以候緹騎私法處之則當引領以待鉏耨思任疑宏光猶在故出此一疏一書不知豫王既定江南已送宏光與王之明北去與貝勒略定浙西魯王監國紹興張國維亦疏參馬士英十大罪士英懼不敢入朝及貝勒攻破義烏士英勸方國安獻監國爲降計會監國遁士英計不就猶擁殘兵與阮大鍼請入關隆武以二凶罪大不放入士英遁至台州入山爲僧阮大鍼請降貝勒士英復爲搜獲與大鍼同隨貝勒辦事及入閩隆武走順昌大軍搜龍杠中得士英大鍼及方逢年方國安連名請隆武出關爲內應疏在諸人已降後大鍼方遊山投崖而死仍戮其屍士英逢年國安駢斬延平城下家口俱給配兵丁初士英方秉政南都煽惑

其主寧南侯左良玉舉兵東下馳疏上宏光云竊見逆賊馬士英出自苗種性本凶頑臣身行間無日不聞其罪狀無人恨其奸邪先帝皇太子至京道路洶傳陛下屢發於慈土英以真爲假必欲置之死地而后快其謀臣前兩疏望陛下從容審處猶冀士英夜氣稍存亦當剔腸悔過以存先帝一縷不意奸謀日甚一日臣自此義不與奸賊共天日矣臣已提師在途將士眦目指髮人人必欲快食其肉臣恐百萬之衆發而難收震驚宮闕且聲其罪狀正告陛下仰祈剛斷與天下共棄之自先帝之變人人號泣士英利災擅權事事與先帝爲難欽案先帝手定者士英首翻之要典先帝手焚者士英修復之思宗改諡明示先帝不足思以絕天下報仇雪恥之心罪不容於死者一也國家提衝文武全恃名器鼓舞人心自賊臣竊柄以來賣官鬻爵殆無虛刻都門有職方賤如狗都督滿街走之謠如越其傑以貪罪遣戍不一年而立陸部堂張孫振以賊污絞犯不數月而黃緣僕少袁洪範與張道濬皆詔獄論罪者也借起廢竟復原官如楊文聰劉泌王燧黃鼎趙書辦等或行同犬彘或罪

楊齋見聞錄

七

等叛逆皆用之於當路凡此之類直以千計罄竹難書罪不容於死者二也閣臣司票擬政事歸六部至於兵柄尤不得兼握士英已爲首輔猶復掌樞是弁髦太祖法度且又引其腹心阮大鍼爲添設尙書以濟其篡弒之謀兩子臬鏡各操重兵以爲呼應司馬昭復生於今日罪不容於死者三也陛下選立中宮典禮攸關士英居爲奇貨先擇其尤者以充下陳罪通於天而又私買歌女寄養阮大鍼家希圖進選計亂中宮陰謀叵測罪不容於死者四也陛下卽位之初恭儉仁明士英百計誑惑進優童豔女損傷盛德每對人言惡則歸君罪不容於死者五也國家遭此大難須寬仁慈愛以收人心士英自引用阮大鍼以來睚眦殺人如雷續祚周鑪等煨煉周內株連蔓引尤其甚者借題三案深埋陷阱將生平不快意之人一網打盡令天下士民重足解體罪不容於死者六也九重祕密豈臣子所敢言士英徧布私人凡陛下一言一動無不窺視又募死士竄伏皇城詭名禁軍以觀陛下動靜曰廢立由我罪不容於死者七也率土碎心痛號者先帝殉難皇子猶存前此定王之事海內至今

傳疑未已況今皇太子授受分明臣前疏已悉士英乃與阮大鍼一手掣定不畏天道神明不畏二祖列宗不畏天下公議不畏萬古綱常忍以先帝已立七年之嗣君爲四海謳歌訟獄所歸者付之幽囚天昏地慘神人共憤凡有血氣皆欲寸磔士英大鍼等以謝先帝此非臣之私言諸將士之言也非獨臣標將士之言天下忠臣義士愚夫愚婦之公言也伏乞陛下立將士英等肆諸市朝傳首四方以抒公憤臣等束兵計刻以待不禁大聲疾呼激切以聞又傳檄云蓋聞大義之垂炳於星日無禮之逐嚴於鷹鷂天地有至公臣民不可罔也奸臣馬士英根原赤身種類藍面昔冒九死之罪業已嬌妾作奴屠髮爲僧重荷三代之恩徒爾狐窟白門狼吞泗上會當國家多難之日侈言擁戴勸進之功以今上曆數之歸爲私家攜贈之物竊弄威福揚蔽聰明恃兵力以脅人致天子閉目拱手張僞旨以警俗俾兵民重足寒心本爲報仇而立君乃事事與先帝爲仇不祇矯誣聖德初因民願而擇主乃事事拂兆民之願何由奠麗民生幻蜃蔽天妖墓障日賣官必先姻婭試看七十老囚三木敗類

惕齋見聞錄

八

居然節鉞監軍漁色罔識君親託言六宮備選二八紅顏變爲桑間濮上蘇松常鎮橫征之使肆行構李會稽妙選之音日下江南無夜安之枕言馬家便爾殺人北斗有朝彗之星謂英名實應圖讖除誥命贈蔭之餘無朝政自私怨舊仇而外無功能類此之爲何其急也而乃冰山發焰鱷水興波羣小充斥於朝端賢良竄逐於厓谷同己者性侷豺虎行列豬猡如阮大鍼某某等數十巨憝皆引之爲羽翼以張殺人媚人之赤幟異己者德並蘇黃才嬾房杜如劉宗周姜曰廣高宏圖等數十大賢皆誣之爲朋黨以快虺如蛇如之狼心道路有口空憐職方如狗都督滿街之謠神明難欺最痛立君由我殺人何妨之句嗚呼江漢長流瀟湘盡竹罄此二罪豈有極歟若鮑魚蓄而日羶若火木重而逾烈放崔魏之瘦狗遽敢滅倫收闔獻之獼猴教以升木用腹心出鎖太尉朱泚之故智幾幾殆有甚焉募死士入宮宇文化及之所爲人人而知之矣是誠河山爲之削色日月倏以無光又況皇嗣幽囚列祖怨恫海內懷忠之臣誰不願食其肉敵國向風之士咸思操盾其家本藩先帝舊臣招討重任

頻年痛心疾首願爲鼎邊雞犬以無從此日履地戴天誓與君側豺虎而併命在昔陶八州靖石頭之難大義於今炳然迄乎韓蘄王除苗氏之奸臣職如斯乃盡是用礪兵秣馬討罪興師當鄭畝討賊之軍憶裴度閑邪之語謂朝中奸黨盡去則諸賊不討自平倘左右凶惡未除則河北雖平無用三軍之士戮力同仇申明仁義之聲聞首嚴焚戮之陰禍不敢妄殺一人以傷天心不敢荒忽一日以忘王義義旗所指正明臣子不忘君父之心天意中興必有問世英靈矢翼皇明之運泣告先帝獨此心肝願斬賊臣之首以復九京還收阮奴之黨以報四望倘惑於邪說誣誤流言或受奸臣之指揮或樹義兵之仇敵本藩一腔熱血鬱爲輪困離奇勢必百萬雄兵化作蛟螭妖孽玉石俱焚之禍近在目前水火無情之時追維心痛敬布苦衷願言共事嗚呼朝無直臣誰斥李林甫之奸邪國有同心尙懷鄭虎臣之素志我祖宗朝三百年養士之德豈其決裂於僉壬大明朝十五國忠義之心正宜暴白於魂魄速張殪虎之機勿作連猿之藪然董卓之腹膏溢三旬籍元載之廚椒盈八百國人盡快

惕齋見聞錄

九

中外甘心謹檄良玉之一疏一檄合之王思任一書一疏雖俱在士英未死之前然皆足以先褫其魄矣先是或又有夜半大書士英堂中者云闖賊無門匹馬橫行天下元兇有耳一兀直搗中原大索不得其人又有布衣何光顯上疏請誅馬士英詔戮於市并籍其家皆宏光時事也

逆闖李自成病死羅公山其姪一隻虎李過率衆降於何騰蛟先是陝西參政都任憤李賊所至掘陵塚甫泄延安即拘李氏宗而詰自成父母骸骼何在初噤不吐則大呼吾將盡掘李氏墓始報其地發視則膚色如生骨更有肉乃刀挫而糞瀝之誠千古快心事哉

掘墓是邊知縣大綬有也口餘生記此云都任何也

宏光使臣左懋第在北聞江南已下七日不食攝政王召見麻衣孝巾草履向上長揖南面而坐攝政王責其當廷抗禮之罪懋第不屈死之先作絕命詞有云峽坼巢封歸路迴片雲南下意如何寸丹冷魄消難盡蕩作寒煙總不磨

黃道周奉隆武命募兵江西江西多其門人弟子人多響應入吉安與楊廷麟萬元

吉相爲呼應兵出徽州與金聲合事終不濟擒送金陵洪承疇與道周同鄉且以道周入望所屬佯疏救之陰實擠之死遂奉朝命戮於市

隆武遣使陸清源賈詔至江頭犒師馬士英峻方國安斬之張國維曰禍在此矣先是國維上疏隆武謂國當大變凡爲高皇帝子孫臣庶所當同心併力成功之後入關者王監國退居藩服禮誼昭然若以倫敘叔姪定分在今日原未假易且監國當人心奔散之日鳩集爲勞一旦南拜正朔鞭長不及猝然有變唇亡齒寒悔莫可追臣老臣也豈若朝秦暮楚之容哉疏出議稍定而閩浙水火之形卒不可解魯亦遣行人林奎同都督陳謙至閩入見發緘隆武見稱皇叔父而不稱陛下大怒下之獄以陳謙爲魯王心腹尋殺之大兵亦卽渡江國維作絕命詞曰艱難百戰戴吾君矢石窮時氣厲雲運去仍爲朱氏鬼精魂當傍孝陵墳從容具衣冠南向再拜赴園池死

貝勒方至杭先遣官吏至浙東令薙髮山陰原任蘇松巡撫祁彪佳赴池水死原任

惕齋見聞錄

十

左都御史劉宗周作絕命詞曰留此旬日死少存匡濟意決此一朝死了我生平事慷慨與從容何難亦何易不食而死原任大學士高宏圖流寓紹興投野寺亦不食死及貝勒渡江禮部尙書余煌啓九門縱民出正衣冠赴水死兵部侍郎陳函輝入雲峯山扃戶自經死禮部侍郎王思任不食死太僕寺少卿陳潛夫與妻妾連臂共沈河死其餘死節義者尙多俟詳考入錄

王之仁崇禎時爲定海挂印將軍及監國封武寧伯又晉興國公督師江頭與張國維連營防禦聞貝勒至方國安先奔江上諸守帥亦各潰散之仁泣曰壞天下事者方荆國也獨一軍堅壘不動及不可支始載其妻妾並二子婦幼女諸孫入海盡沈之蛟門下捧所封敕印北面再拜併投之水單船獨至吳淞義冠登陸一時士民共爲駭愕聚觀予亦隨衆往視之仁慷慨嘉定太倉入蘇州地方官仍用夫馬船隻送至江寧抗見洪承疇謂仁係先朝大帥不欲以身赴波濤願來死於明處承疇待以賓禮強之薙髮之仁從容笑卻之其兄卽從烈皇帝於煤山紅閣下跪帝膝前引

帶扼脰同死之司禮太監王之信也可稱一家死節云

闖賊破燕京凡載諸臣死節刑辱投逆授僞職事如北京日記生還紀事燕邸日鈔國諱忠姦實錄孤臣紀哭甲申紀事再生錄日星不晦錄諸本言之詳矣獨倡降紀事則專志無錫王孫蕙逆案存真則專志無錫秦汧趙王奕王孫蕙張琦四人降臣異態則專志嘉善魏學濂學濂以潛歸詐死屬其子永枚詭稱聯絡義師不遂身死故嘉輿有公檄之討嘉善有公揭之駁皆爲學濂一人項煜亦以賊敗竄歸故吳門鄉紳則有王心一等之討庠序則有袁良弼等之討且討之至再至三松江則討楊枝起朱積常熟則討陳必謙時敏趙士錦歸起先吳江則討沈元龍嘉定則討申芝芳施鳳儀金壇則討周鍾呂兆龍無錫則討秦汧等四人吳門以項煜獨歸故先討之後又討錢位坤宋學顯湯有慶義聲煌煌獨金壇檄文最短而勁又峭以嚴爲諸檄之冠事既繪明言多壯往後諸賊或大申國法或伏死里門不必再申斧鉞獨諸本所未載後事或未詳者據實筆之

惕齋見聞錄

十一

項煜闖賊授僞太常寺丞及賊敗西奔始踉蹌南竄歸家後忽發一檄稱逆鬪斗筲小器管蒯賤材末自敍官銜官詹學士之上冠以皇明二字吳郡鄉紳王心一徐汧等合詞討之其略曰蓋聞古人有言主辱臣死未有天子殉社稷而臣下可以倖生者也忠義之與叛逆判若天淵未有北面事賊授意縱歸而可以託言起義視顏就列者也項煜從逆之實昭然在人耳目魏學濂家人親見其屈膝稱臣吳爾壩家人確言其已躡僞職武進士王三錫京商周雲章則鑿鑿指其所授之官階是皆生人活口現在可質然心一等正不須據此以聲其罪也但問煜事先帝爲何官四品官詹不可謂非大僚且講臣也講臣受上殊禮亞於輔臣乘與出入必爲扈從今先帝何在而煜不思從死蒙面偷生其肉不足食矣況賊陷京城閉門大索自殉節諸君子而外凡係職官非被拷掠卽汚僞命無一人得脫者煜獨何術逍遙歸里且自燕涉淮間關三千里奚無譏訶秦長脚者耶其爲賊間諜不問可知及閱其刻檄更自和盤托出矣夫闖賊逆惡滔天讎不共戴而煜沾沾評其材器詎以衣冠一則曰斗

箝是擬賊以從政之列也一則曰菅蒯是望賊以代匱而祝凡百君子之無棄也此何心歟若沐猴一語尤可痛憤煜以賊比項羽將視先帝爲何如主乎苟非闖賊縱煜使歸俾其延譽江南何以曲加粉飾代爲寬假若此也且煜自署原官冠以皇明獨不思普天率土本無兩大何故於官銜之上忽加國號煜之胸中居然有二姓矣至云紫色蛙聲而稱爲閩位是直欲剖天朝之正統與亂賊以分峙也悖逆不道莫大乎是且煜若不昧心從賊何以知其腹心左右皆潦倒之人何以慮其弩末蕭牆作恐懼之語充其意不過極言賊之易與以緩我與朝除兇雪恥之師以遂彼逆賊豕突狼奔之毒而其受賊心膺之託與助賊嚮導之謀不覺逗漏言下殆天奪其魄而使之自爲發露也且竟閱終篇無一痛艾倖生之語而止以身出網羅四字輕輕點過若以爲主自當殉難臣自當苟免者言至於此凡有血氣誓不與煜俱生矣吳郡素稱禮義之邦今乃從賊孽孽自煜而外若錢位坤等不止一人皆里人在北親知灼見者心竊恥之然未有梟獍公行魑魅晝見如煜者也庠生袁良弼徐遵燿等

惕齋見聞錄

十二

又一討再討之煜自知不容於鄉里潛遁入浙至慈谿託庇於其門生馮元颺蓋煜二十年詞林甲戌癸未兩分較禮闈元颺其癸未所得士也比至元颺竟不納慈之人覺之羣毆煜於泮池旁且曰爾號水心遂以索繫煜頸從橋上納之水又復提出如是者上下數十次淪死水中愚謂泮池清潔地惜未投之濁流也

時敏字子求以兵垣受賊爲四川知縣賊敗南歸欲再入仕籍而畏時論賄權相借開屯大瞿山爲名號召徒衆分給武職諸衙郡邑之豪及無藉者輒響應然卒無效及金陵降敏潛歸常熟鄉之人聚衆搏擊之去其勢納之口中而死嘉定施鳳儀受賊僞工政府從事親撤去九廟神主歸不敢抵家託史相國爲監紀同時選四川縣令者數十人其後仕國朝最顯著者成克鞏梁清標姚文然皆是已

周亮工御史也潛入僞將軍劉賊幕中爲記室歌唱狎暱獨免於刑後亮工以江官司道官行部至嚶不矜其貴寓某氏園招搖約結詩酒稱雄一時余心鄙其人竊一窺其顏色何瑞徵韓四維朝賀稱先四維爲賊宏文院修撰國初四維貴游吳中間

亦至嚙抽豐剝民多受其毒

龔鼎孳降賊受直指使後見人輒曰我原要死小妾不肯小妾者其爲垣中時所娶秦淮倡顧媚也此見馬士英奏疏中鼎孳出項煜之門及鼎孳主康熙庚戌癸丑兩科貢舉時曾以煜子屬舉於鄉亦見其衣鉢有真傳施報或不爽云

金之俊被賊二夾復仕賊爲兵政府侍郎及大兵初至之俊獨先薙髮請降九王子大喜卽授軍司馬將軍印歷登政府爲相予告還籍極力媚撫院韓世琦提督梁化鳳爲世琦建樂康亭爲化鳳建樂宴亭並時虎邱極爲煇耀以世琦號心康故名其亭曰樂康以化鳳敗海師故名其亭曰海宴又喉府縣峻罰民之贖鏹築虎邱之山塘歸其功於世琦曰韓公塘且勒諸石推世琦謂文章過於唐之昌黎功業過於宋之忠獻人多恥笑之過者無老幼賢愚見韓公塘碑記有之俊名輒以磚石磨之以代涕唾其面其名亦遽毀滅其罷相居鄉事多類此及死諡爲文通

魏學濂忠節公大中子孝子學溆弟負時望中崇禎癸未科進士選授庶吉士京師

惕齋見聞錄

十三

破學濂託同榜庶常趙頻頻與賊僞相牛金星鄉同年引援得先謁牛賊牛云汝是忠孝之家正要借重濂一躬曰不敢及引見闖賊亦云魏學濂先赴朝參特授戶政府司務濂又叩頭曰不敢臣不過早知天命有歸耳及赴任欲覓緋袍其僕攜忠節公舊衣至濂見之奪魄不敢服借吳爾壩僞製合式衣衣之賊下令隨來諸從官皆乘輜或騎馬獨降官止許策蹇濂服僞式方領黃袍背負爲救騎一小驢在草場督芻指揮任意賊衆又不聽其命共諱之陳名夏糾分邀僞官韓霖等飲濂行令猜拳舉座無敵僞官駭服旋領泛海平浙之救差回江南歸不敢出令其子允枚僞云濂曾遣間使走容城聯絡義旅冀得一當翼輔皇嗣既聞太子二王俱爲賊得知事不可爲遂就縊賄屬無錫鄒漪裝演其事謬爲志之且僞爲絕命詞云忠孝千古事於我只家風漫爲姦詔希以掩飾聞聽其嘉興合郡有公討反逆僞官魏學濂之一檄矣其本邑嘉善則又合詞以駁之曰逆賊僞戶政府司務魏學濂從逆最著閩郡公檄業已臚其罪狀詎意賊濂國敗降賊賊敗逃歸反令逆子允枚捏稱殉難冀抹公

論夫肯死者必不降賊降賊者必不肯死以速死報國者必死於宗社淪亡之日即以遲死報國者亦必不死於逆賊潰敗之時自北都被陷南還者述學濂逆狀至悉也梓行諸刻列從賊姓名無遺濂者又至詳也賊濂自三月二十一日投遞職名因鄰寓同年趙頰以進身於牛金星之幕因相知逆賊韓霖以揚譽於李自成之前嗣是就選於僞吏政府宋企郊見賞於僞戶政府楊王休寫欽授之帖以拜客撤舊住之寓而進司至一則曰定然一統再則曰天命有歸既上請避賊諱之書復獻僨漕平浙之策皆北歸者目擊心傷及逆奴張順誇耀告人彰彰在人耳目再按其逆跡有現證者數之降賊各官呈進職名賊濂以先有牛賊之薦闖賊特賜召見云汝是忠孝之家先赴朝參合行優擢特授戶政司司務蓋賊官之司務猶朝官之郎中故云特授爾時學濂鞠躬謝曰不敢遂受職而出此候考選黃岡知縣徐敬時新科中翰程兆科於四月十四日出都至吾郡對人面述如此闖賊下令僞官自陝來者乘馬新降者止乘驢賊濂服僞式紗帽黃袍雲補背負僞敕策蹇行市中此南京己卯

惕齋見聞錄

十四

舉人施化遠候選在都親見其事又賊濂在草廠發軍士馬料僞軍譁不能制旋上平浙三策又釀金置酒邀諸僞官同飲賊濂謔浪歌呼行令猜拳滿座無敵此桐城方爾仙北歸爲其友述之最詳又賊濂因參謀韓霖薦引得先諸僞除授此吾郡進士譚貞良南還具言之闖賊自四月十六十七敗後京城降官俱散四月十九賊濂與王自超及雲間盛國芳出都分路盛已抵家向人道之又降官翁元益家人於四月十六出京親見賊濂結束行裝則賊濂曷嘗死哉夫唐之顏杲卿袁履謙身在外郡得乘權起義今京師被陷內外皆賊凡有兵柄者或降或逃學濂身已降賊何得託云起義主上蒙難又非前代出幸之比何得藉口從權若以東宮二王尙在隱忍苟活則何必上平浙三策請避賊父名且今二王現在吳營學濂何反就死至云拒賊僞命被斫一臂則凡諸賊受賊刑者卽一夾二夾北來諸書記之極詳何獨於賊濂一臂遺之其折臂在四月初五方爾仙出都在四月十四日曾往別賊濂譚貞良出京亦在四月十六日俱未聞折臂事也豈旬日間臂遂完好抑學濂自有神

膠續之耶至謂四月二十九日投繯則亂逆口供自呈鐵案矣闖賊擬於四月十七日登僞位十二卽報總兵吳三桂兵到十三吳鎮先遣探騎張示德勝門令城內居民俱白衣冠以待義師城內人各買白布賊兵各處占卜問不被天兵殺否闖賊遂於是日率兵出迎累戰累敗二十六還走入城二十七倉皇僞位二十八縱火燒宮闕捆載西逃二十九遇吳兵於蘆溝復大敗吳鎮遂入京師今賊濂投繯乃在此日是固賊亡與亡所不待言若云受逆闖深恩則兩世詞諫受先帝恩不可謂薄又如允枚云四月二十左右知事無可爲決意一死夫此時闖兵已敗賊之心胥皆殲於通州反謂事無可爲蓋惜闖賊之事無可爲也至云濂與保定孫鍾元約起義勤王四月十三祝開美啟行濂至淵寓泣曰眞保間消息杳然萬一不濟當以死繼之夫吳帥方舉義復仇濂苟有心何不私奔關外助舉義旂反假手於保定之孫鍾元十三日人皆知吳兵將到濂苟有心當倍慶幸何反云不濟且闖賊出戰之時賊勢已危賊濂何不於城中約結反正賊衆聞吳兵勢盛人人惶迫賊濂何不誘其徒黨使

楊齋見聞錄

十五

轉禍爲福是數者無一焉而賊在卽爲賊臣賊去卽爲賊死卽有百口何以自白死以鳴節賊濂不死於三月十九賊至之日而死於四月二十九賊去之日其節何居死以爲國賊濂不死於先帝賓天之日而死於賊氛潰散之日死豈爲國盛國芳既同學濂出都今云二十九死則前日去者何人豈命將殞絕魂先離舍耶抑允枚自有一父出都一父縊死耶賊濂家早已發喪稱初九就縊嗣後北音日來難塞衆聽而身旣逃歸恐罹重典則又稱武林顧中翰書至知二十九投繯人止一死賊濂乃有二死江南諸郡豈止一顧中翰南旋千萬人之耳目不足憑而一顧中翰之耳目乃可據數十冊之流傳皆無實而一顧中翰之手書乃可徵且顧中翰何人得非與賊濂同北面僞庭連鑣南還者耶至祝開美書原未嘗言其死且聞學濂近日遣死友二人走懇開美作書開美以師門之誼不忍辭之至云吳江沈大行先生遣使相報夫元龍已作僞兵政府從事視顏還里近亦爲鄉所攻若其遣報濂死斯固狐兔之誼得無允枚亦代元龍有所飾說以相酬耶卽其遮生掩死之妄詞便爲從賊偷

生之實錄蓋背國向賊不特賊濂視爲固然卽逆子允枚聞賊盛則喜賊敗則憂朝
禱夕祈似乎別有覆載凡其親族朋友皆然是五月初一日逆奴張順到家傳知北
信合邑摧震爭走詢允枚而允枚嘻笑迎客面有私喜人人怪之初無所謂望北號
踊僵仆數刻也同時宗族親戚索其家信一觀抵死不肯並未嘗見所謂留其身以
有爲將來必能自拔之語也迨逆奴誇主之新榮而續歸者述濂之受職始知允枚
辭色有爲而然允枚隨遣逆奴二人入都通信甫至淮上卽與賊濂及其親隨逆奴
張登相植以五月十九日夜同抵家有逢之郡中者無何而張登以侵晨過縣治前
人多見之嗣聞新皇御宇懼國憲難逃遂草定遺屬裝蓋僞棺陽合張登爲扶襯初
歸之狀先使逆子作模糊引證之書嗚呼賊濂之謀則狡矣然百僞俱全難逃一實
青史之斧鉞尙靈天下之人心不死豈可眞生假死移逆作忠以欺萬世卽賊濂今
活手作書或改五月初一日之家信或作四月二十九之絕詞自應源源不絕要之
忠逆判若天淵今日自有定論三月二十一以前隨先帝而死者爲眞忠則三月二

惕齋見聞錄

十六

十一以後事闖賊而稱臣者豈非眞逆四月十二以後借兵雪恥驅闖賊出都者爲
眞忠則四月二十九見賊出都以死送賊者豈非眞逆但論其逆與不逆不必問其
生與不生允枚乃猶藉口宋文丞相丞相在燕三年而不受元職何賊破城九日而
遂作僞官且當時未有破元兵如吳鎮者忠逆相去霄壤何可比倫今乃草間求活
逢人強辨是用再述逆臣之穢跡以請司敗之典刑卽死論死而死有餘辜卽罪定
罪而罪在不赦其本邑之公駁如此然則鄒漪之書不志實亦可嗤矣

王孫蕙考選入京於三月十六日陛見烈皇帝力陳君辱臣死之義聲盡繼之以哭
冀得動聽十九日京城陷孫蕙徐步中庭若有所思忽大笑命家人取竹一竿曳黃
布一幅大書永昌皇帝萬萬歲揭燈懸門拉同鄉諸人往迎至馬太史寓不可又至
趙玉森寓謂曰百行孝爲先君家太公年高圖書錦足矣玉森曰予受知崇禎固深
然國破家亡實其自作之孽予將捐性命以殉之理既不必將逃富貴以酬之情亦
奚堪孫蕙曰方今開國之初吾輩須爭先着遂同出遇張琦琦曰無棄故人老身尙

能揚塵舞蹈三人因與俱不數武望見秦汧已先行矣先是秦汧以兵部職方司受守城之任見賊入汧卽跪而叫曰兵部職方司主事秦汧恭候聖駕賊不聞又高聲大叫曰兵部職方司主事秦汧恭候聖駕軍馬之聲如風雨驟至雖高聲大叫賊終不聞至是三人急呼與語汧曰吾決計已久慮無同志得諸公同事宜途不患無幫手況趙姑夫尤休戚相關者乎蓋玉森之妻汧之姑也遂握手大笑揚揚而前同詣僞吏政府尙書宋企郊各執手版陳姓名孫蕙袖中忽出一紙兩手拱額上大聲曰臣王孫蕙進表三人皆愕然不知表中作何語慮有所觸忌連累不測甚恐須臾從階下遙見宋賊閱表微笑且時時點頭曰好文字好文字三人始愧謝弗如然秦趙終以不悅恨其不與同也張曰勿以小嫌而傷同氣秦趙遂不言次日企郊升堂開選三人皆授四川縣令琦梓潼汧射洪玉森內江孫蕙獨超擢長蘆鹽運司運使企郊曰貴里同事諸人君何以獨得此孫蕙叩首曰聖主洪恩大人妙鑒蕙死且不朽企郊曰非也主上以君一表與周庶常鍾所草之詔堪作新朝雙璧薄以一官相報

惕齋見聞錄

十七

耳願好爲之蓋以鍾詔有云比堯舜而多武功邁湯武而無慚德蕙表則有云燕北旣歸宜拱山河而受籛江南一下願羅子女以承歡故云雙璧是時與選者各給僞印契而已孫蕙獨加僞敕二道以示寵榮孫蕙自矜有佐命功乘輿張蓋衣緋衣導以欽命督鹽旗一對過帝后梓宮前見匍伏而哭者睜目視之不下輪一指也及出都門牛賊以下皆飲餞之僞帥郭將軍獨送馬二匹一路乘傳至山東入德州界望見城上插大明中興旂幟甚駭前此道路喧傳遼帥吳平西大敗逆闖卷甲西奔而孫蕙猶茫茫前進弗及覺至是詢之始知御史盧世灌與諸生謝陞所集義師截殺僞官莫得過者蕙始惶懼無策取督鹽旂碎之并燬僞憑契焚僞敕理僞印於地盡去行李所實貼官銜硃標處乃字皆實黏粹不能去又陸行乏水蕙與羣奴爭以津唾磨刮之此皆出於錫之人歸自途中目擊而心傷者傳之最確也

國家當大故之際主辱臣死千古正義死固甚正死亦誠難責人者毋遽以其難望之人也觀黃冠歸故鄉古人有行之者矣靖難時雪菴和尚河西傭補鍋匠之屬不

一其徒君子終鑒其苦節諒其誠心許而錄之於殉節諸君子之後北都淪陷范李
施馬輩死節彙彙大義炳於人區國有旌典野有史記茲皆弗載獨載諸從逆賊臣
然亦摘其尤者嗚呼諸賊皆出制科夙享榮名如周鍾秦泚王孫蕙者無恥喪心何
至若是至項煜魏學濂又或託之生或託之死希借忠以掩逆狡更甚矣特表著之
使二賊奸鬼知天下後世之不可欺也北都陷有賣菜傭者過梓宮前慟哭觸堦死
其詩曰饌玉侯鯖舞袖酣桔槔猶把五陵談寥寥難荷綱常重付與貧傭一擔擔南
都下有乞兒題詩橋上號百川橋下乞兒而投死秦准者其詩曰三百年來養士朝
如何文武盡皆逃綱常留在卑田院乞丐羞存命一條洪承疇泣南中時又有石城
乞兒姚忠者其詩曰左持虎杖右龍鍋醉臥長街醒復歌借水西江頻洗眼看他天
道竟如何嗚呼三詩者其亦雪菴和尚河西傭補鍋匠之流亞歟不然何寓意之深
遠也余故備錄三詩而次之於諸逆賊之後使覽者知所考鏡焉

金之俊凡字登歸吳中營建太傅第名其居之後街曰後樂街前巷曰承恩坊吳人夜

惕齋見聞錄

十八

榜其門曰後樂街前長樂老承恩坊裏負恩人又贈對句云一二三四五六七八
孝弟忠信禮義廉無恥又云仕明仕闔仕清三朝之俊傑縱子縱孫縱僕一代豈凡
人此鄉評也朝諡又曰文通可見朝野皆有公道然之俊固不肖家中尚有賢妻令
姪自之俊仕國朝後其妻獨與之俊分室而居不受詔命曰我自自有詔封不必相溷
也其姪居常與之俊論忠孝兩義姪從容曰監斬二王可謂忠乎二王者崇禎子永
定二王也俊方食默無以應不覺匕箸之墜地云

二王下落未明東宮亦然故後有
南京疑案此載之俊監斬乃知爲
之後世烏得而知之

洪承疇負明厚恩其在南也獲徽州金聲命聲跪促之降許待以不死聲南向坐地
嫚罵曰汝決非洪承疇若洪督師久已戰死受先帝十三壇御祭賜贈錫廕豈尙在
此耶洪慚甚急引出就戮南中亦有對句云史筆標明雖未成功終可法洪恩浩蕩
不思報國反成讎與史相對舉洵確論也

曹石震初爲嘉定令豪放不檢尤溺龍陽罷官歸楚改革後十餘年又復過嚶始與

侯氏齟齬及是至特爲文弔廣成及諸死事者黃陶菴其同年也弔其墓其家餉以酒坐中述曾練義師三千旅於黃州遇洪兵六千騎馬步不敵而敗然猶手持長刃刺死十餘人遁去山中妻女皆手刃之不致失節今日之稱義師者皆亂臣賊子耳因指侯黃曰此乃真忠義之士氣象與爲令時迥別云

吳中錢牧齋

名謙益字受之

吳梅村

名峻業字峻公

負時重望皆起仕國朝登貴顯復不久遽歸一日錢至郡衣服袖如今制甚窄獨綴以領有士謁其舟見之曰先生真兩朝領袖錢惡焉者久之梅村當中秋過虎丘坐石場上有客作詩曰千人石上坐千人貴賤窮通不等倫可惜婁東吳學士兩朝天子一朝臣後吳臨終屬其家人曰凡銘旌墓道皆去官爵止稱詩人吳梅村

梁溪華氏簪纓世胄乙酉之後自天啟乙丑會元琪芳而下冠蓋猶有十七人皆不薙髮巴帥之來南也仕宦士民戕殺無算一旦問罪於華拘琪芳等至官廳皆罵不絕口巴大怒命駢戮之制使馬撫軍土勸其薙髮即可免死諸華詬詈特甚巴曰卽薙髮吾尚不宥立斬之

惕齋見聞錄

十九

壬寅夏應試赴郡訪戚某至則見羣兒焚書於庭余於煙焰中檢得清初精鈔本二册完好無損戚謂有緣舉以慨贈卽此錄與定思小紀二種也得之欣喜累日可慮龐羣識

今夏海上王君培孫收得吾邑沈氏鳴堅白齋散出邑人金君手鈔定思小紀惕齋見聞錄兩種郵示趙學翁擬印入叢編學翁以兩書皆吾邑故物屬爲校訂披讀之下乃知卽係三十年前石友先生從寒架舊鈔本傳錄者其借書還書二手札迄今尙存篋衍札內並未述及發見別本茲以原鈔對勘金君鈔本已刪繁就簡改竄甚多明季人士之紀載枝蔓乃其通病後之讀者當會其意而略其詞固不必削足就履也爰商同學翁仍據原鈔本付印以存其真至兩書撰人王君欣夫跋語考證極詳不再贅及丙子小寒海隅龐羣又識


右惕齋見聞錄一卷清蘇泚撰案泚字眉函嘉定人蘇淵字眉聲之從弟淵中崇

禎壬午舉人順治壬辰會試副榜卽書中所記收黃陶菴兄弟遺屍者而灑之仕履則不可考惟光緒嘉定縣志謂灑家有瑟園嘗與周人玉結社石佛菴是亦一時知名士也縣志藝文載灑所著書有申酉聞見錄惕菴稿二種今此書名惕齋見聞錄因記崇禎甲申至乙酉間事故又名申酉聞見錄且據此則灑之表字當爲惕齋志稱惕菴稿亦誤是書記明末江南防禦之事頗多佚聞而於當時從賊之士大夫魑魅狀態揭載無諱是時馬士英當國左良玉之一疏一檄王思任之一疏一書魏學濂降賊鄉人公討之檄至今讀之猶爲髮指今借常熟龐君可廬藏舊鈔本付印讀龐君跋尾知此書與定思小紀皆出於灰燼之餘俾三百年前遺著不致湮沒可廬勤勤護持之功誠不可沒也歲丙子季秋吳縣王大隆跋

惕齋見聞錄



04591



626.83,043	4591
72194	
定思小記 楊齋身聞錄	
(明)劉尚友撰	

河北省立
天津圖書館

626.83,043
 72194
 4591

